

**KELICAP GUNUNG**  
Black-throated Sunbird

FAMILI: Nectariniidae  
NAMA SAINTIFIK: *Aethopyga saturata*



**CIRI-CIRI**

Spesies ini terbahagi kepada beberapa sub-spesies di mana individu jantan bagi sub-spesies *A.s petersi* menyerupai spesies Kelicap Mas, *A. gouldiae* dan spesies Kelicap Ekor Hijau, *A.nipalensis*, cuma ianya berbeza dari segi bahagian atas dada yang berwarna hitam dan bahagian bawah dada yang berwarna kuning pudar serta terdapat jalur-jalur berwarna perang. Bahagian perut dan tongkeng berwarna kuning keputihan. Bahagian atas mahkota kepala dan ekor pula berwarna ungu kebiruan yang agak gelap serta bahagian belakang badan yang berwarna merah gelap. Bagi sub-spesies *A.s wrayi* (Semenanjung Malaysia), sub-spesies ini berada pada peringkat pertengahan di mana bahagian tongkeng berwarna kuning pudar. Individu betina bagi spesies ini mempunyai bahagian tongkeng yang berwarna kuning pucat serta bahagian bawah badan yang pudar. Spesies ini mempunyai saiz di antara 11 sm-15 sm.

**MAKANAN**

Makanan utama spesies ini terdiri daripada madu bunga. Spesies ini juga adakalanya memakan serangga-serangga kecil dan juga labah-labah.

**HABITAT**

Spesies ini boleh dijumpai di kawasan hutan dipterokap dan kawasan pinggir hutan pada ketinggian di antara 300 m-1,700 m dari aras laut.

**BUNYI**

Burung ini mengeluarkan bunyi yang tinggi *swi tis* dan *tsi* serta diselangi dengan bunyi pekikan *swi'it'it'it'it'it* dan *swi'*. Selain itu, ia juga mengeluarkan bunyi yang berulang-ulang dan laju dengan nada yang tinggi *tit,tit-it* dan *tiss-it*.

**PEMBIAKAN**

Musim membiak bagi spesies ini adalah pada bulan Januari hingga Oktober di mana sarang dibina berbentuk seperti buah pear dan terdapat satu poket untuk masuk ke dalam sarang. Sarang ini bergantung di atas ranting pokok pada ketinggian di antara 1 m-3.6 m dari paras tanah. Telur yang dihasilkan sebanyak 1-2 biji berwarna putih dan terdapat bintik-bintik berwarna hitam ke warna kelabu berukuran kira-kira 14.6 X 11.3 mm secara purata.

**STATUS**

Akta 76/72, dipelihara sepenuhnya.